

Piglia't il temp – take your time

Il rumantsch al Campiunadi mundial da skis alpin FIS a San Murezzan

■ (cp) Il rumantsch è la lingua tradi-ziunala da la regiun ospitanta dal Campiunadi mundial da skis alpin FIS 2017. La quarta lingua naziunala da la Svizra vegn perquai ad esser visibla ed udibla mintga di a San Murezzan. In punct culminant è il concert da la band da hip-hop rumantscha **Liricas Analas**, preschenta da la **Lia Rumantscha** ils 17 da favrer 2017 en il Parc dal Kulm. Il puter vegn discurre ed instrui anc en diversas vischnancas da l'Engiadin'Ota. Da las ragischs rumantschas dattan perditga a San Murezzan tranter auter er intgins nums da cultura en la zona da las cursas da skis, sco per exempel Tschainas u Foppa. En collavuraziun cun la Lia Rumantscha han ils organisateurs dal campiad mundial procurà ch'il rumantsch vegnia ad esser visibel ed udibel mintga di er durant il Campiad mundial da skis alpin FIS a San Murezzan. Cun in curs da lingua divertent fin ad in concert da hip-hop pon ils giasts ed ils fans sa famigliarisar da maniera multifara cun la lingua da la regiun.

L'emprim in crashcurs, silsuenter hip-hop

Saja quai per il flirt durant l'après-ski suenter las decisiuns sin pista u sco impuls divertent per emprender pli tard la lingua: In emprim inscunter cun il rumantsch pussibiliteschan ils acturs engiadinais **Annina Sedláček** e **Lorenzo Polin** en il rom dal Street Festival «Inscunter» en la zona da peduns da San Murezzan. Ils 7 ed ils 15 da favrer 2017 preschenta la Lia Rumantscha a partir da las 16.00 in «crashcuors da rumantsch» – in'avischinaziun al rumantsch curta e divertiva, elavurada aposta per il campiad mundial nua che passantas e passants vegnan a savair quai ch'els vulevan gia deditg savair davart la lingua.

En il Parc dal Kulm, atgnamain il lieu central dal campiad mundial, vegnan surdadas las medaglias. Ma er avant e suenter las undrientschas datti mo victurs. Per quai procura in program da divertiment che fa suar cun garanzia in e scadin. Per exempel il venderdi saira dals 17 da favrer 2017 cura che la Lia Rumantscha preschenta l'act principal sut il titel «Rumantsch sül Kulm»: In concert cun las **Liricas Analas**, l'enconuscenta band da hip-hop rumantscha. La sairada da concert vegn lantschada da la band da rock engiadinaisa Prefix.

Actualitad dal di cun scharm rumantsch

En collavuraziun cun la gasetta locala «Engadiner Post/Posta Ladina» preschenta la Lia Rumantscha mintga di ina contribuziun en lingua rumantscha sin il



Signet da la preschientscha da la Lia Rumantscha al campiad mundial.

MAD

blog uffizial dal campiad mundial (<http://blogstmoritz2017.tumblr.com/>). Cun in tschegn d'egl vegn commentada l'actualitad dal di dal puntg da vista rumantsch. Al blog sa partecipesch persunalitads che han ina relaziun cun il rumantsch e cun ils eveniments al campiad mundial.

L'app – la clav al rumantsch

Sin l'app uffiziala dal campiad mundial «St. Moritz 2017» chatt'ins tut las infurmaziuns davart las purschidas rumantschas. L'element central furma in vocabulari rumantsch-tudestg ch'è vegni mess a disposiziun cun sustegn finanziel da la Lia Rumantscha. Il vocabulari electronic è disponibel en puter e vallader. El sa basa sin ina banca da datas linguisticas da **Gion Tscharner**, messa a disposiziun cun sustegn da l'Uniun dals Grischs. Gia a chaschun dal campiad mundial l'onn 2003 aveva la Lia Rumantscha ed in pitschen vocabulari che cunteneva

lezza giada anc en furma stampada terms specifics davart il campiad mundial en rumantsch, tudestg ed englais.

Programm

07-02-2017 Inscunter – Street Festival, San Murezzan
16.00 / 17.00 crashcuors da rumantsch cun Annina Sedláček e Lorenzo Polin
15-02-2017 Inscunter – Street Festival, San Murezzan
16.00 / 16.30 crashcuors da rumantsch cun Annina Sedláček e Lorenzo Polin
17-02-2017 Parc dal Kulm – Rumantsch sül Kulm 20.00 Prefix, 20.30 Liricas Analas
Mintga di: Blog rumantsch sin <http://blogstmoritz2017.tumblr.com/> Vocabulari rumantsch sin l'app «St. Moritz 2017»